

清史稿



趙爾巽等撰

# 清史稿

第

八

冊

卷五四至卷六七（志）

中華書局

內部發行

清 史 稿

(第 八 冊)

趙爾巽等撰

\*

中 華 書 局 出 版

(北京王府井大街 36 號)

新華書店北京發行所發行

廣州紅旗印刷廠印刷

850×1168 毫米 1/32·9<sup>3</sup>/<sub>8</sub>印張·168千字  
1976年7月第1版 1976年7月廣東第1次印刷  
統一書號 11018·632-8 定價：0.89 元

# 清史稿卷五十四

## 志二十九

### 地理一

有清崛起東方，歷世五六。太祖、太宗力征經營，奄有東土，首定哈達、輝發、烏拉、葉赫及寧古塔諸地，於是舊藩札薩克二十五部五十一旗悉入版圖。世祖入關翦寇，定鼎燕都，悉有中國一十八省之地，統御九有，以定一尊。聖祖、世宗長驅遠馭，拓土開疆，又有新藩喀爾喀四部八十二旗，青海四部二十九旗，及賀蘭山厄魯特迄於兩藏，四譯之國，同我皇風。逮於高宗，定大小金川，收準噶爾、回部，天山南北二萬餘里，氍毹湮酪之倫，樹領蛾服，倚漢如天。自茲以來，東極三姓所屬庫頁島，西極新疆疏勒至於葱嶺，北極外興安嶺，南極廣東瓊州之崖山，莫不稽顙內鄉，誠係本朝。於皇鑠哉！漢、唐以來未之有也。

穆宗中興以後，臺灣、新疆改列行省，德宗嗣位，復將奉天、吉林、黑龍江改爲東三省，

與腹地同風。凡府、廳、州、縣一千七百有奇。自唐三受降城以東，南衛邊門，東湊松花江，北緣大漠，爲內蒙古。其外涉瀚海，阻興安，東濱黑龍江，西越阿爾泰山，爲外蒙古。重之以屏翰，聯之以婚姻，此皆列帝之所懷柔安輯，故歷世二百餘年，無敢生異志者。

太宗之四征不庭也，朝鮮首先降服，賜號封王。順治六年，琉球奉表納款，永藩東土。繼是安南、暹羅、緬甸、南掌、蘇祿諸國請貢稱臣，列爲南服。高宗之世，削平西域，巴勒提、痕都斯坦、愛烏罕、拔達克山、布哈爾、博洛爾、塔什干、安集延、浩罕、東西布魯特、左右哈薩克，及坎車提諸回部，聯翩內附，來享來王。東西朔南，闢地至數萬里，幅員之廣，可謂極矣。洎乎末世，列強環起，虎睨鯨吞，凡重譯貢市之國，四分五裂，悉爲有力者負之走矣。清初畫土分疆，多沿明制，歷年損益，代有不同。其川瀆之變易，郡邑之省增，疆界之分合，悉詳稽圖志，並測斗極定高偏度，以畫中外封域廣輪曲折之數，用備一朝之掌焉。

### 直隸

直隸：禹貢冀、兗二州之域。明爲北京，置北平布政使司、萬全都指揮使司。清順治初，定鼎京師，爲直隸省。置總督一，曰宣大。駐山西大同，轄宣府。順治十三年裁。巡撫三：曰順天，駐遵化，轄順天、永平二府。康熙初裁。曰保定，駐真定，轄保定、真定、順德、廣平、大名、河間六府。順治十六

年裁。曰宣府。駐宣府鎮，轄延慶、保安二州。順治八年裁。五年，置直隸、山東、河南三省總督。駐大

名。十六年，改爲直隸巡撫。明年移駐眞定。康熙八年，復移駐保定。雍正二年，復改總督。而

府尹舊治順天，爲定制。先是順治十八年增置直隸總督，亦駐大名。康熙五年改三省總督，八年裁。康熙三

十二年，改宣府鎮爲宣化府。降延慶、保安二州隸之。雍正元年，置熱河廳，改眞定爲正定。二年，

增置定、冀、晉、趙、深五直隸州，張家口廳。三年，升天津衛爲直隸州，九年爲府。十年，置

多倫諾爾廳。十一年，熱河廳、易州並爲直隸州。十二年，置獨石口廳。降晉州隸正定。乾隆七

年，承德仍爲熱河廳。八年，遵化升直隸州。四十三年，復升熱河廳爲承德府。光緒二年，

置圍場廳。隸承德。三十年，置朝陽府。明年置建平隸之。三十三年，升赤峰縣爲直隸州。置開

魯等二縣隸之。今京尹而外，領府十一，直隸州七，直隸廳三，散州九，散廳一，縣百有四。北

至內蒙古阿巴噶右翼旗界；一千二百里。東至奉天寧遠州界；六百八十里。南至河南蘭封縣界；

一千四百三十里。西至山西廣寧縣界。五百五十里。廣一千二百三十里，袤二千六百三十里。宣

統三年，編戶共四百九十九萬五千四百九十五，口二千三百六十一萬三千一百七十一。其

山：恆山、太行。其川：桑乾卽永定、滹沱卽子牙、衛、易、漳、白、灤。其重險：井陘、山海、居庸、紫荆、倒馬諸關，喜峰、古

北、獨石、張家諸口。交通則航路：自天津東南通之采、上海，東北營口，東朝鮮仁川、日本長崎。鐵路：京津、津榆、京漢、

正太、京張。郵道：東出山海關達盛京綏中，西出紫荆關達山西靈丘，南涉平原達山東德州，北出古北口達熱河。電線：

西北通庫倫，西南通太原；由天津東北通奉天；海線自大沽東通之罘。

**順天府**：明初曰北平府。後建北京，復改。自遼以來皆都此。正統六年，始定曰京師。領州六，縣二十五。順

治初，京師置府尹、府丞、治中。其順天巡撫駐遵化，康熙初裁。十五年，升遵化爲州。二

十七年，置四路同知，分轄所屬州、縣。分隸通永、霸昌二道。並兼統於直隸總督。雍正元年，復以部

院大臣兼管府事，特簡無定員。九年，置寧河。乾隆八年，遵化復升直隸州，以玉田、豐潤

屬之。廣四百四十里，袤五百里。北極高三十九度五十五分。領州五，縣十九。遵，南京，今

城西南，唐幽州藩鎮城也。金增拓之。至元而故址漸湮。元之大都，則奄有今安定、德勝門外地。明初縮城之北面，元

制亦改。永樂初，重拓南城，又非復洪武之故矣。今皇城周十八里。自正陽門之內曰大清門；東南曰長安左門；西南

曰長安右門；東曰東安門；西曰西安門；正北曰地安門，舊曰北安門，順治九年更名。大清門之內曰天安門，舊曰承天

門，順治八年改。左太廟，右社稷壇。嚮明而治，於茲宅中焉。其內端門，左闕左門，右闕右門。其內紫禁城在焉。北枕

景山，西枉西苑，苑有瀛台，太液池環之。南與端門屬者曰午門。北神武門，東東華門，西西華門。午門之內，東協和門，

東出爲文華殿；西熙和門，西出爲武英殿，舊曰雍和門，乾隆元年更名。其正中太和門，左昭德門、體仁閣，右貞度門、宏

義閣；其內則太和、中和、保和三殿，至乾清門止。東景運門，西隆宗門。凡此皆曰外朝，制也。外則京城，周四十里，

爲門九：南爲正陽門，南之東崇文門，南之西宣武門，東之南朝陽門，東之北東直門，西之南阜成門，西之北西直

門，北之東安定門，北之西德勝門。皆沿明舊。而八旗所居：鑲黃，安定門內；正黃，德勝門內；正白，東直門內；鑲

白，朝陽門內；正紅，西直門內；鑲紅，阜成門內；正藍，崇文門內；鑲藍，宣武門內。星羅棋峙，不雜廁也。外城長二十八里，爲門七：南爲永定門，左左安門，右右安門，東廣渠門，西廣寧門；在東、西隅而北向者，東東便門，西西便門。並明嘉靖中築。鼓樓在地安門外，明永樂中燬，乾隆十二年重建。大興衝，繁，疲，難。倚。府東偏，隸西路廳。北有榆河，自昌平入，納清河。西北：玉河，自宛平入。歧爲二：一護城河，至崇文門外合泡子河；一入德勝門爲積水潭，卽北海子，流爲太液池，分爲御溝。又合德勝橋東南支津，復合又東，爲通會河。涼水河亦自宛平入，逕南苑，卽南海子，龍、鳳二河出焉。龍河淤。南路廳駐黃村。縣丞駐禮賢莊。有青雲店、鳳河營、白塔村三鎮。有采育營巡司。有驛。鐵路。宛平衝，繁，疲，難。倚。隸西路廳。西山脉自太行，爲神京右臂。西北二十里甕山，其湖西海。乾隆十五年賜山名曰萬壽，湖曰昆明。有清漪園，光緒十五年改曰頤和。相近玉泉山，清河、玉河源此。玉河逕高梁橋，一曰高梁河。永定河自懷來入，至盧師山西，亦曰盧溝河，錯出復入。有灰壩、減河。汛十二，石景山有南北岸同知：全轄者七，石景山、盧溝橋二、北頭工上、北頭工中、南頭工上、北二工下；分轄者五，南頭工下、北頭工下、北二工上、南三工、北三工。自順治八年至同治三年，改道十有六，截北流歸中泓，逕魚壩口、三鳳眼入海。蓋道光二十二年以來，雖小潰徙，無害。又凉水、牯牛、龍泉三河兼出西南。西有海淀，有暢春、圓明二園，咸豐末燬。西路廳駐盧溝橋，有巡司。縣丞駐門頭溝。又龐各莊、青白口、東齋堂巡司三。沿河口、磨石口、榆堡、平羅營、五里坨、趙村、王平口、天津關鎮八。鐵路。良鄉衝，繁，難。府西南七十里。隸西路廳。永定河自宛平入。汛四，並分轄，隸石景山南岸同知：北頭工下、北二工上、南頭工下、南二工。康熙四十六年建金門石閘，後廢。乾隆三年移建南二汛，改減水石壩仍曰金門閘。永定減水壩十有七。公



村河自房山入，爲牯牛河，復合茨尾河。盧河自房山入，逕琉璃鎮曰琉璃河，納挾活河。北有黃新莊行宮，南有郊勞臺。  
縣丞駐趙村。固節、長辛店二驛。鐵路。固安 繁，難。府西百二十里。隸南路廳。永定河道南北岸同知，石景山同知  
 駐。永定河自宛平入。汛六，隸南北岸同知，三角淀通判：全轄者二，南四工、北四工上；分轄者四，南三工、北三工、北  
 四工下、南五工。拒馬岔河自涿入，舊有金門關。減河亦自涿入，納太平河，曰牯牛河，歧爲黃家河，其西蜈蚣河，並淤。  
東南十八里韓城。南七十里四鋪頭。有牛坨鎮。縣驛一。永清 簡。府南少東百四十里。隸南路廳。三角淀通判駐。  
永定河自固安入。汛七，隸北岸同知：其通判全轄者三，南六工、北五工、北六工；分轄者四，北四工下、南五工、南七工、  
 北七工。有信安鎮巡司，兼隸霸。東安 簡。府東南百四十里。隸南路廳。永定河自永清入。汛三，並分轄，隸三角淀  
 北通判：南七工、南八工上、北七工。其故道淤。鳳河自大興入。有舊州鎮。縣驛一。香河 簡。府東南百二十里。隸  
東路廳。西有北運河，自通入。有王家務減河，雍正九年濬，長百四十里。北窩頭河亦自通入。縣驛一。通州 衝，繁，  
 疲，難。府東四十里。隸東路廳。通永道、倉場總督駐。順治十六年省潞縣入之。管河州判駐。白榆、瀰瀰三河並自  
順義入。榆納通惠河，與白會，是爲北運河，納涼水河。瀰瀰逕窩頭村曰窩頭河。鳳河自東安入。北門外石壩，州判掌  
 之，十五京倉所漕。其東土壩，州同掌之，州西中二倉所漕。馬頭店、永樂店、馬駒橋三鎮。潞河、和合二驛。鐵路。三  
河 衝，繁，難。府東少北百十里。隸東路廳。西北盤龍山有行宮，乾隆十九年移大新莊。北有洵河，自平谷入，側城東  
南。西南窩頭河，自通緣界入。鮑丘河，古巨浸，源自塞外，淤。今出西北田各莊，晴爲枯渠，雨則洶注，俗曰瀉肚河。  
 有馬坊鎮。縣驛一。武清 衝，繁，疲。府東南九十里。隸東路廳。西南永定河自東安入。汛三，隸三角淀北岸通判：

南八工上、南八工下、北七工。東北：北運河自香河入。康熙三十八年決筐兒港，明年濬爲減河，後淤。同治末，復濬新減河。寶坻北有鳳河自通入，雍正四年改自墩上村折南，下至天津雙口入淀。三角淀一曰東淀，古雍奴，文、東、武、靜、文、大七州縣境。雍正四年，放永定於淀，塞且半，僅王慶坨一角耳。乾隆十六年後，導河支貫淀而東，平蕪彌望。管河同知駐河西務，通判楊村，並有驛。八鎮：王慶坨、安平、桐柏、崔黃口、三里淺、南蔡村、筐兒港、黃花店。寶坻繁，難。府東少南百八十里。隸東路廳。北：蘆運河自蘆右會洶河緣界入，逕江寬村，鮑丘河自三河入，納窩頭河，裏鹹河注之。又南有筐兒港新減河。其北王家務減河淤。知縣劉枝彥濬自大白莊至俵口，並修窩頭、裏鹹隄。有玉甫營鎮。縣驛一。寧河衝繁，難。府東南三百里。隸東路廳。雍正九年改明寶坻之梁城千戶所置。海，東南九十里爲北塘口。蘆運河自寶坻入，屈曲環城而南，有七里海，匯王家務、筐兒港二減河，播爲潁口，寧軍、沽二河分注之，復納金鐘河。東南：大沽口界天津，海沙綠界入。其北北塘口。東南：盧臺鎮，天津河捕通判、通永鎮總兵駐。有巡司、鹽大使。北塘口、新河莊、營城三鎮。昌平州衝繁，難。府北九十里。霸昌道駐。北路廳駐鞏華城，州隸之。北：天壽山，明十三陵在焉。西北：榆河自延慶入，伏而復出，左合山水，右納南沙河。又東，龍泉河會絳州營河注之。七渡河亦自延慶入。其南九渡河、忙牛河，並出東北。邊牆西首廟兒港口，東至糜子峪口。汛四：橫嶺路、鎮邊城、常峪城、白羊口。又訖慕田峪口，汛一：黃花路。湯山、蘭溝行宮二。港泉營、牛房、奮奄屯、沙屯、高麗營、蘭溝、前營、前屯、皂角屯，凡九鎮。榆河驛，州治，及迴龍觀，二。順義衝，難。府東北六十里。隸北路廳。北：牛欄山。白河自懷柔入，逕東麓，合懷河。其東狐奴山，灤灤河出焉，一名箭桿河。絳州營河出縣西，納忙牛河。又榆河自大興入。三家店、南石槽行宮二。二鎮：漕河

營、楊各莊。縣驛一。密雲 衝，繁，難。府東北百三十里。隸北路廳。縣南：密雲山。東：九松山，舊曰九莊嶺。西有沽河，自灤平入，合白馬關河，是爲白河。右出一支津。潮河亦自灤平入，合湯河，又納乾塔河，側城西南來會，俗亦曰潮白河。潮河營，提督駐。古北口關，副都統、巡司駐。西營二：石塘路、石匣城。汛二：潮河川、白馬關口。東營二：曹家路、牆子路。汛五：司馬台、黑峪關、吉家營、楊家堡、鎮羅關。有劉家莊、羅家橋、要亭莊三行宮。鳳皇、石匣二驛。懷柔 衝，繁。府東北百里。隸北路廳。響髻山、祇園寺行宮二。石河出其東，下流爲洳河。白河自密雲入，其支津亦自縣入，納雁溪水，復合。西：七渡河自昌平入，合九渡河，側城東南，合小泉河，曰懷河。有汛。縣驛一。涿州 衝，繁，難。府西南百四十里。隸西路廳。西：獨鹿山。東北：永定河自良鄉入。其金門開引河，淤。西北：拒馬岔河自房山分入而合，胡良河合杖引泉注之。至浮洛營東，挾活河錯入復出，注琉璃河。又東納牯牛河，淤，歧溝。西南：督亢陂。東南：古涿水，渾。有王家店、松木店、柳河營、馬溝村、長溝五鎮。涿鹿驛。房山 繁，難。府西南九十里。隸西路廳。西南：大房山，一曰大防山，有溝山峰。雍正八年，鳳凰集此。又石經山。龍泉河，古防水，二源，出西北大安山，東南流，曰盧河。有沙河，環城，合壩兒河注之，是爲琉璃河。拒馬河自涑水入，緣界逕鐵鎖崖，岔河出焉。歧爲二。其東杖引泉。胡良河、挾活河並出西南，而茨尾河、雅河出東北。又順水河自宛平入。有磁家務巡司。有吉陽驛。霸州 衝，繁。府南百八十里。隸南路廳。玉帶河自保定入爲大清河。河南支徑苑家口曰會同河。中支中亭河，亦自保定入，逕栲栳圈，納牯牛河，又歧爲北支，下流爲辛張河，復錯入牯牛、黃家河，視永定爲盈涸。北支，古運糧河。光緒初，游擊陳本榮濬之，復修蒼兒淀隄，植柳六萬一千株。行宮二：一太堡村，一蘇橋鎮。有主簿，兼隸文安。又信安鎮巡司，兼隸永清。有益津

**驛。**文安 繁，難。府南少東三百四十里。隸南路廳。大清河三支並自霸入，趨東淀。其北、中二支合於勝芳西，曰辛張河。文安窪周三百里，有火燒、牛台、麻窪諸淀。光緒八年，濬臺頭以下河道，長千九百二十丈。左家莊有行宮。縣驛一。**大城** 繁，難。府東南三百九十里。隸南路廳。西北：會同河自文安入，逕臺頭村，有行宮。大清河、辛張河並自文安入。子牙河自河間入，舊納古洋河，光緒中，改自獻之朱家口，故渠久湮。又黑龍港西支自青入，合東支河。**保定** 簡。府南少西二百里。隸南路廳。西南：大清河自雄入，曰玉帶河，逕張青口，口西西淀，東東淀，乾隆二十八年界之。又北合趙王河，至盧各莊，康熙中，導爲中亭河，合十望河入霸。縣驛一。**薊州** 衝，繁。府東少北百八十里。隸東路廳。西北：盤山與桃花山、葛山，有行宮三。薊運河自明天順初引潮河派今州，後廢。順治初復濬，以豐陵聚其上源。梨河東自遵化入，合淋河，至城南五里橋，始曰薊運河。折南，洵河出州北黃崖口外，錯出至三河，復緣界來會。汛四：黃花店、青山嶺、黃崖關、將軍石關。有漁陽驛。**平谷** 簡。府東北百五十里。隸北路廳。東北：洵河自薊入，合獨樂河，側城西南，會石河，即洳河。縣驛一。

**保定府**：衝，繁，疲，難。隸清河道。明，領州三，縣十七。康熙八年，自真定移巡撫於此，爲直隸省治。雍正二年，改總督。布政使、清河道等同駐。十二年，升易州爲直隸州，以涑水屬之。又改深澤屬定州。道光中，省新安。東北距京師三百五十里。廣三百五十里，袤四百里。北極高三十八度五十一分。京師偏西五十二分。領州二，縣十四。清苑 衝，繁，疲，難。倚。清苑河即府河，古沈水上游。奇村河自滿城入，合白草溝，環城，左納徐河溝，又東合金線河。唐河自望都入，合陽

城河，納齊賢莊河，今淤；咸豐中，南徙；同治末，益南入蠡，至安州，復緣界入，下與府河會，爲大清河中支。有大激店鎮，張登店巡司，金臺驛。鐵路。**滿城** 衝。府西少北四十里。西南：抱陽山。西有淪河，自易州入而伏，至縣東湧爲一畝，鷄距二泉，合申泉，爲奇村河。方順河自完縣入，歧爲白草溝、金線河。徐河自易州入，一曰大冊河，東入安肅。千里長隄，首縣境，訖獻縣臧家橋，互順、保、河三府。河丞駐方順橋鎮。有陘陽驛。**安肅** 衝。府北少東四十五里。西有黑山。西南：益村嶺。電河自易州入，合曲水河，至城北納鷄爪泉河，下至新安入淀。其北萍泉河自定興入，東入容城，其支津自城西右出，與曹河並入安州。有梁門陂、白溝驛。鐵路。**定興** 衝，繁。府北少東百二十里。北有拒馬自涑水入，逕城西而南，納中、北二易水及馬村河，緣界入容城、新城爲界水。北又有界河。西南：鷄爪河。東南：藍溝。有范陽陂、固城鎮、宣化驛。鐵路。**新城** 衝，繁。府東北百五十里。南有拒馬，自定興緣界，其岔河北自固安入，至十九堡左導爲蘆僧引河，今淤。又西南合紫泉河、斗門河，納藍溝河，卽界河錯出復入者。又南曰白溝河，入容城復合。有方官、新橋、白溝三鎮。汾水驛。**唐簡**。府西少南百二十里。北有堯山。東北：望都山。西北：大茂山。西有唐河，古涑水，自廣昌入，錯出，左合倒流河。西：雹水，右納恆河、馬泥河、唐河。又東北有放水河。倒馬關西北有岳嶺、柳角安、軍城鎮、周家堡四口。**橫河口** 巡司。縣驛一。**博野** 疲。府南九十五里。東南：豬龍河自安平緣界入，一曰蟾河，屈南逕白塔村入蠡。唐河自清苑入。縣驛一。**望都** 衝，難。府西南八十里。舊曰慶都，乾隆十一年改。東南：唐河自定州入。有九龍泉，環城珠湧，東出爲龍泉河。有翟城驛。**容城** 簡。府東北九十里。北有拒馬河，西支自定興緣界入，與東支白溝河合。西清而弱，東濁而強。又雹河自安肅入，其萍河涸。縣驛一。**完簡**。府西少南七十里。西：伊祁山，祁水出焉，

卽曲逆河。圖經惡其名，改方順。納放水河。其舊所合蒲河，涸。唐河自其縣再錯入，合清水河。蠡繁，難。府南少東九十里。南：豬龍河自博野入，一曰楊村河。唐河自博野入，自道光初北徙。河丞駐仇村。縣驛一。雄衝，繁，難。府東北百二十里。西淀，縣南。互安州、高陽、任丘，周三百三十里，匯府境諸水，所謂「七十二清河」。趙北口扼其中。橋十二。四角河自安州入，出第五橋，曰大清河，錯出復入。白溝河自容城入，南及大港、柴禾二淀。大清河乃改由藥王行宮北與會。有歸義驛。祁州簡。府南少西百二十里。南有漳沱北支，自深澤緣界。其北豬龍河，匯定州澧、沙、滋三水。澧卽唐嘉慶初徙，孟良河奪之。是爲豬龍河。又南逕程各莊入博野。縣驛一。束鹿繁，難。府南少西二百四十里。西北：漳沱自晉州入深州爲南支，其支津入安平，同治十年所徙。其故道七。縣丞駐小章村。縣驛一。安州簡。府東少北六十里。道光十二年以新安省入。府河、唐河自清苑入而合，納曹河，逕城北爲依城河，右注白洋淀，與豬龍河自高陽入者相望也。左注難淀，復合爲四岔河，亦曰四角河。西淀都九十有九，白洋最廣，次燒車，難淀最陿。新安鄉行宮二。州驛一。高陽簡。府東南六十五里。西北：唐河自蠡入，亦曰土尾河。東南：豬龍河亦自蠡入，順治中，復決布裡村，故亦曰布裡河。舊合泚河，卽高河，縣氏焉，淤。縣驛一。

正定府：衝，繁。隸清河道。總兵駐。明曰眞定。領州五，縣二十七。雍正元年曰正定。二年，升冀、趙、深、定、晉爲五直隸州，以南宮等十七縣屬之。十二年，降晉州，並所屬無極、藁城與定州、新樂還來隸。東距省治二百九十里。廣二百七十里，袤三百八十里。北極高三十八度十一分。京師偏西一度四十八分。領州一，縣十三。正定，衝，繁，難，倚。舊曰眞定，雍正元年改。

西有漳沱，自平山入。有冶河故道二。其北林濟河，合西北諸泉及旺泉河。又北，滋河自新樂入，伏而東。漳沱性善徙，溢北，滋南，百數十里衝漫幾徧。今河乃同治七年改決，爲康熙中東入深、安、饒故道。有恆山、伏城二驛。獲鹿衝。府西南六十里。南有封龍山。北五峰山，浚水出焉。合小沙、左金河。西有鹿泉水，東至大要舍納冶河。今淤。有鎮寧驛。井陘簡。府西南百三十里。井陘山東北有關。北綿蔓河自山西平定州入，合甘洵河，一曰微水。折北，左得金珠泉，至東冶村曰冶河。西南固關，寄平定州，置參將。其北娘子關。有汛。邊牆西北首達滴巖，南訖楊莊口。有陘山驛。阜平簡。府西北二百十里。順治末，省。康熙二十二年，復置。大茂山東北，平陽河出焉。沙河自山西繁峙入，納靈丘北流、鶴子諸河曰派河，又東合班峪、燕支諸河。又汙河出縣南白蛇嶺。邊牆東北首落路口，西南訖當城河口。有龍泉關、長城嶺。汛東有王快鎮。康熙中，縣寄此。又茨溝營鎮。縣驛一。欒城簡。府南六十里。西有浚河，自獲鹿入，納北沙、金水二河。南、西有故城二。關城驛。行唐簡。府北七十五里。西北箕山，郃河出其北兩嶺口，合甘泉河、龍門溝，側城東南，合賈木溝。北派河自曲陽入，合曲河。西滋河自靈壽入而伏。靈壽簡。府西北六十里。南漳沱自平山緣界合松陽河、衛河。衛河，禹貢衛水也。西北滋河自山西五臺入，納汙河。又東南合慈峪河，亦曰慈河，入行唐。邊牆北首白草溝口，南訖車孤駝口。有又頭鎮巡司。乾隆中移慈峪鎮。平山簡。府西少北八十里。西北有房山，濺河出焉，古石白水，今湮。漳沱自山西五臺首入縣西北，始出山。又納冶河，始湍悍。邊牆北首合河口，南訖清風口。有洪子店巡司。元氏簡。府南少西九十里。西北封龍山，北泚水所出，下流入胡盧河。無極水南入贊皇會南源，復入而合，錯出復入，至紙屯村與槐河會。豬龍河自縣西匯諸山水，北沙河出割髭嶺，今並涸。其南金水河，東入欒



城。縣驛一。贊皇簡。府西南百二十里。雍正三年自趙州來隸。西南贊皇山，洮河出焉。其北沘河，南源二，出可蘭、四望二山。槐河二源，一黃沙嶺，一紙糊套山，今並涸。王家坪鎮，咸豐未改汛。縣驛一。晉州簡。府東少西南九十里。西北漳沱自無極入。同治十年，改自藁城入。又故道二。有驛。無極簡。府東七十里。雍正二年改屬晉州，十二年復。漳沱河自藁城入，再錯出，復入，逕東漢，復歧爲二。其滋河入逕縣南，屈東又北。木刀溝自新樂入，合護城河，錯出復入，並入深澤。縣驛一。藁城簡。府東南五十里。雍正二年改屬晉州，十二年復。漳沱自正定入，合西韓、旺泉二河。順、康中再決，並東南過周頭入白牧河。滋河自正定、木刀溝自新樂入，與王莽溝並涸。縣驛一。新樂衝，疲。府東北七十五里。雍正二年改屬定州，十二年復。派河自行唐入，合郃河。木刀溝出平山之澗河，滋河奪之。順治中，知縣林華，皖濬自西南閼泉鎮。嘉慶初，滋之支津復自正定入奪之，錯出復入，合浴河。縣驛一。

### 大名府：

衝，繁，難。總兵駐。順治初，置大順廣道。雍正初，改清河道，十一年，復置。初沿明制，領州一，縣

十。雍正三年，割內黃、濬、滑分隸河南彰德、衛輝。乾隆二十三年，省魏縣分入大名、元城。東北距省治八百里。廣二百里，袤三百七十里。北極高三十度二十一分三十秒。京師偏西一度六分。領州一，縣六。大名，衝，繁，難。倚。府南偏。明徙府南八里南樂鎮。乾隆二十二年圯於漳，復故，惟縣丞駐。衛河自河南內黃入。其新衛河自清豐入，錯出復入來會。漳河自臨漳分入，一入衛，一至府治南爲漳河引河。東有縣故城三。東北：小灘鎮，嘉慶中置河主簿。縣驛一。元城，繁。倚。府北偏。故城三。東南：衛河自大名入。其漳水引河，古漳河入，逕北張莊而合，並東入館陶。東南：馬頰河自南樂入。縣驛一。南樂，難。府東南五十里。



嘉慶二十一年，新開衛河始自大名入。光緒十四年後，漳河始自其縣來會。西有朱龍河、岳儒固河，東六塔廢河，並自清豐入。又東：龍窩河自山東觀城入，至龍窩村止。夏秋霖潦，輒復彌漫。然六塔平壤故有順水溝，康熙中，知縣王培宗濬；光緒二十一年，原思瀛再濬，命曰永順，邑賴之。清豐難。府南少東九十里。西有廣陽山。衛河自河南內黃綠界。西有古馬頰河。朱龍河自開入。有順河堡鎮。縣驛一。東明繁，疲，難。府南二百二十里。西有黃河自長垣入。自明以來，在縣境者三徙：嘉慶八年奪洪河，二十四年奪漆河，咸豐五年奪賈魯河，後復北徙爲今瀆。南有杜勝集鎮。雍正十年改守備置都司，明年置巡司。舊有通判，道光中裁。開州繁，疲，難。府南百二十里。同、光中，黃河自東明潰入者六道，合而復分。北支古瓠子河，一曰毛相河，故小渠，康熙中決荆隆口，始大。南支古濮渠，並入山東濮州。又有黃河故道二，曰古馬頰河、古朱龍河。又碛河自河南滑縣入，亦曰馬頰河。徐鎮堡、兩門集、井店集、柳下屯四鎮。呂丘堡，州判駐。古定鎮有廢巡司。州驛一。長垣繁，疲，難。府西南二百九十里。東有黃河自河南蘭封入，舊逕盤岡里，咸豐八年徙蘭岡，同治二年復折西自蘭通集至舊城口爲今瀆。縣丞駐大黃集。有大岡廢巡司。縣驛一。

順德府：衛。隸大順廣道。東北距省治五百七十里。廣二百八十里，袤百五十里。北極高

三十七度七分。京師偏西一度四十九分。領縣九。邢臺衛，繁，難。倚。西：封山。野河出西北馬嶺

口，淤。今自內丘入，會稻畦、漿水、路羅三川爲洪河。北有達活河，合沙應河。又有百泉河，右會七里河。西：黃村巡

司。有龍岡驛。鐵路。沙河衛。府南三十五里。沙河自河南武安入，會邢臺之洪河。右出支津，逕城南而東，納西狼

溝水，其東卽東狼溝。縣驛一。鐵路。南和繁，疲。府東南四十里。西：百泉河自邢臺入。沙河支津亦自其縣入，合東